

**Malaysia, Singapura akan tingkat penglibatan dengan rantau Asia Tenggara
- Azmin
AstroAwani
22 September 2019**

SINGAPURA: Malaysia dan Singapura akan terus memperkukuh hubungan dua hala selain mempertingkatkan usaha libat urus dengan rantau Asia Tenggara, kata Menteri Hal Ehwal Ekonomi Datuk Seri Mohamed Azmin Ali.

"Kita yakin dapat memanfaatkan potensi ekonomi ASEAN secara bersama," katanya menerusi hantaran pada akaun rasmi Twitter beliau hari ini, bersempena lawatan kerjanya selama dua hari ke republik itu.

Pada hantaran sama, Mohamed Azmin turut menyertakan gambar beliau bersama Timbalan Perdana Menteri merangkap Menteri Kewangan Singapura, Heng Swee Keat yang menjadi hos pada majlis makan tengah hari di Singapore Botanic Garden.

"Kita telah mengadakan perbincangan yang produktif serta berpotensi mengenai cara untuk mencatat kemajuan di masa depan," katanya.

Mohamed Azmin turut berkongsi penghargaannya atas penglibatan dan pertukaran pendapat menarik dengan Heng yang disifatkan beliau sebagai penuh bersemangat dan idea bagi meningkatkan kerjasama antara Malaysia dan Singapura.

"(Lebih-lebih lagi) kita adalah jiran terdekat di antara satu sama lain. Adalah menakjubkan bagaimana pertemuan secara santai adakalanya dapat mencetuskan libat urus produktif jika perhubungan itu berteraskan rasa saling percaya dan pemahaman bersama," katanya.

Mohamed Azmin tiba di sini pada Sabtu.

Terdahulu pada 19 September lepas, Kementerian Hal Ehwal Ekonomi berkata dalam lawatan kerja itu, Mohamed Azmin akan menemui anggota kanan kerajaan Singapura bagi memperkukuh hubungan dua hala.

Beliau juga dijadual menemui Menteri Perdagangan Antarabangsa dan Industri republik itu, Chan Chun Sing di luar acara Formula Satu (F1) Grand Prix Singapore Airlines Singapura 2019.

-- BERNAMA

© 2019 AstroAwani Network Sdn. Bhd.

(535275-D) All Rights Reserved.

Source: <http://www.astroawani.com/berita-malaysia/malaysia-singapura-akan-tingkat-penglibatan-dengan-rantau-asia-tenggara-azmin-218202>